

## 2 TESALONAIKA

<sup>1</sup> Iga Pol na Sailas na Timoti na iga qalub anjam endi nengrenyosim niŋgi Tesalonaika qureq di loueqnub qaji nuŋgoq qarinjyonum. Niŋgi na gago Abu Qotei wo Tamo Koba Yesus Kristus wo naŋgi aiyel beternjrejunub.

<sup>2</sup> Tamo Koba Yesus Kristus aqa Abu Qotei wo naŋgi aiyel niŋgi qa are boleinjrimqa niŋgi lawo na soqniy.

*Gulbe oqa bati qa Tesalonaika Kristen naŋgi sinjila na tigelejunub*

<sup>3</sup> O ijo was, iga gaigai niŋgi qa are qaloqnsim Qotei biŋiyeqnum. Iga kere degyeqnum. Di kiyaqa? Nuŋgo areqalo Yesus qa sinjilateqnub qaji di tulan kobaqujaeqnu deqa. Niŋgi segi segi qa qalaqlaiyo kumbra yeqnum. Nuŋgo kumbra di dego tulan kobaqujaeqnu.

<sup>4</sup> Iga qure qure kalilq di Qotei aqa tamo uŋgasari naŋgi nuŋgo kumbra deqa sainjroqnsim nuŋgo ñam soqteqnum. Kumbra uge kalil jeu tamo naŋgi na niŋgi engeqnub qaji deqa ti gulbe kalil nuŋgoq di branteqnu qaji deqa ti iga na Qotei aqa tamo uŋgasari naŋgi sainjreqnum. Osim endegsi minjreqnum, “Tesalonaika Kristen naŋgi gulbe kalil qoboiyoqnsib Yesus qa naŋgo areqalo sinjilateqnub.”

*Qotei a kumbra bole tirtiŋ na tamo uŋgasari naŋgi peginjreqnu*

**5** Gulbe kalil di nunjgoq di branteqnu deqa iga endegsi poigwo, Qotei a kumbra bole tiñtiñ na iga pegigeqnu. Niñgi jaqatinj eqnub di aqa utru agiende. Qotei a nunjgo jaqatinj di unoqnsiq merñgeqnu, “Bole, niñgi jaqatinj di eqnub deqa e nunjgo Mandor Koba sosiy niñgi taqatñgwa kere.”

**6** Mondonj Qotei a kumbra bole tiñtiñ endeqaji yqas. Jeu tamo agi niñgi gulbe engeqnub qaji nañgi a na kamba gulbe enjrqas.

**7** Tamo Koba Yesus aqa lan añgro nañgi ti ñamyuwo ti lañ qureq na mandamq aisib tamo ungasari kalil nañgo ñamgalaq di brantqab. Brantib bati deqa Qotei na iga ti niñgi ti aqaryaigosim gago gulbe kalil iga bini qoboiyeqnum qaji di kobotim iga aqaratqom.

**8** Yesus a mandamq aisim tamo ungasari Qotei qaliesai qaji nañgi ti tamo ungasari gago Tamo Koba Yesus aqa anjam bole dauryqa urateqnub qaji nañgi ti ñolawotnijrzas.

**9** Osim nañgi awai ugedamu enjrqas. Nañgo awai uge agiende. Nañgi Tamo Koba a ombla sqasai. Nañgi aqa singila koba ti rian ti unqasai degó. Nañgi tulanj isaq di sosibqa bati gaigai padalosib sqab.

**10** Bati Qotei na nami atej qaji di brantimqa Yesus a bosim nañgi degsim ñolawotnijrzas. Ariya Qotei aqa segi tamo ungasari Yesus qa nañgo areqalo singilateqnub qaji nañgi kalil a mandamq aiy-oqnim unsibqa aqa ñam soqtosib a qa tulanj areboleboleinjrim sqab. Niñgi degó nañgi koba na areboleboleingim sqab. Di kiyaqa? Qotei aqa anjam iga nami merngoqnam qaji di niñgi quisib nunjgo areqaloq di singilateb deqa.

*Pol a Tesalonaika Kristen nañgi qa pailyeqnu*

<sup>11</sup> Deqa ijo was, iga bati gaigai niñgi qa are qaloqnsim gago Qotei endegsi pailyeqnum, “O Abu, ni na Tesalonaika Kristen nañgi aqaryain-jroqname. Yimqa kumbra kalil ni nami nañgi dauryqa metnjrem qaji di nañgi dauryoqnbqa ni unoqnsim tulañ arearetmoqnqas. O Abu, ni na nañgi singilatnjroqnimqa nañgi kumbra bole kalil dauryqajqa are koba soqnim dauryoqnqab. Osib Yesus qa nañgo areqalo singilatoqnsib aqa wau geregere ojoqnqab.” O ijo was, iga degsim niñgi qa Qotei pailyeqnum.

<sup>12</sup> Gago Qotei wo Tamo Koba Yesus Kristus wo nañgi aiyel niñgi qa are boleinjreqnu. Deqa niñgi gago Tamo Koba Yesus aqa ñam soqtoqniy. Yimqa a na kamba dego nuñgo ñam soqtetjgoqnqas.

## 2

*Yesus a bosaisoqnimqa Qotei aqa dal anjam gotrañyo qaji tamo kobaquja a namoqna brantqas*

<sup>1</sup> O ijo was kalil, mondor gago Tamo Koba Yesus Kristus a lañ qureq na boqnimqa niñgi iga ti aqa singaq di koroqom. Iga deqa niñgi anjam kiñala mernjim quiy.

<sup>2</sup> Tamo qudei nañgi mareqnub, “Tamo Koba a bqajqa bati brantqo koboqo.” Osib olo qudei mareqnub, “Anjam di Qotei aqa Mondor na babtosiq iga mergwo.” Olo qudei mareqnub, “Anjam di Qotei aqa anjam bole.” Olo tamo qudei nañgi mareqnub, “Anjam di Pol aqa wau qujai nañgi ti neñgrenyonab iga sisiyem.” O was, niñgi nañgo anjam di quisib prugaib.

**3** Naŋgo anjam di gisanj. Nangi gisanj kumbra dego yeqnub. Deqa ningi naŋgi daurnjraib. Ningi quiy. Yesus bqajqa bati di laŋa brantqasai. Bati di brantqa laqnimqa kumbra qudei namoqna endegsi bqas. Tamo gargekoba naŋgi Qotei qoreiy-oqnsib sqab. Qotei aqa dal anjam gotranjo qaji tamo kobaquja a dego boleq dqas. Boleq dosim mondonj a ɻamyuwoq aisim padalogetqas.

**4** Tamo kobaquja di a diqoqnsim aqa segi ñam soqtoqnsim gisanj qotei kalil naŋgi tulanj buŋnjroqnqas. Osim a Qotei aqa atra tal koba miliqiŋ gilsim di awoosim marqas, “E segi Qotei.” O ijo was, kumbra kalil di namoqna brantim Kris-tus a bunuqna bqas.

**5** E nunjo qureq di sosimqa tamo kobaquja deqa ningi saingoqnem. Niŋgi ijo anjam di olo are walŋgwo kiyo?

**6** Tamo kobaquja di a bosaiunu. A bqajqa bati agi Qotei a nami atej unu. A namoqna baim deqa tamo bei na a bqajqa gam getentejunu. Gam getentetejunu qaji tamo di ningi qalie. Tamo kobaquja a bqajqa batiamqa Qotei na marim a brantqas.

**7** Niŋgi qalie, tamo kobaquja di a Qotei aqa dal anjam gotranjo qaji tamo unu. A bini ulioqnsiq waueqnu. A uliesoqnimqa Qotei na gam getentejunu qaji tamo di taqal waiyim tamo kobaquja a boleq dqas.

**8** A boleq dimqa bati deqa Tamo Koba Yesus a rianj koba ti bosim aqa me mondor medabuq na puyqas. Puyimqa jagwa koba dosim dal anjam gotranjo qaji tamo kobaquja di qalsim moirotqas. O ijo was, Yesus aqa rianj dena tamo kobaquja di

tulañ padaltougetqas.

<sup>9</sup> Dal anjam gotranjo qaji tamo kobaquja di a Satan aqa singila ti bosim aqa gisanj kumbra na mañwa gargekoba tamo uñgasari nañgi osornjroqnas.

<sup>10</sup> Osim aqa kumbra uge dena a na tamo uñgasari padalo gam dauryeqnub qaji nañgi gisa gisanjnjroqnas. Tamo uñgasari nañgi di Qotei na elenq aqnsiq aqa anjam bole minjreqnaqa nañgi deqa arearetnjrosaieqnu.

<sup>11</sup> Deqa Qotei na nañgo areqalo niñaqyetnjrimqa nañgi aqa anjam bole dauryqa torei uratosib Satan aqa gisanj anjam dauryoqnnqab.

<sup>12</sup> Deqa iga qalieonum, tamo uñgasari kalil Qotei aqa anjam bole nañgo areqaloq di singilatosaeqnub qaji nañgi di Qotei na ñolawotnjsim awai ugedamu enjrqas. Di kiyaqa? Nañgi kumbra uge uge dauryqajqa areboleboleinjreqnu deqa.

### *Qotei na niñgi elenqajqa marsiq giltñgej*

<sup>13</sup> Ariya ijo was kalil, Tamo Koba a na niñgi tulanq qalaqalainjgeqnu. Deqa iga bati gaigai niñgi qa are qaloqnsim Qotei binjiyeqnum. Tulanq nami Qotei na niñgi elenqajqa marsiq giltñgej. A niñgi giltñgwa osiqa endegsi are qalej, “Ijo Mondor Bole na Tesalonaika Kristen nañgi singilatnjrimqa nañgi ijo segi tamo uñgasari bolequja sqab. Sosib ijo anjam bole nañgo areqaloq di singilatib kumbra dena e na nañgi elenqai.” O ijo was, utru deqa Qotei na niñgi giltñgej.

<sup>14</sup> Aqa are endegsiunu. Niñgi gago Tamo Koba Yesus Kristus aqa rianq koba ti aqa singila ti unqab. Aqa are degsi sonaqa a na niñgi metñgej. A Yesus

aqa anjam bole iga mare mare laqnum qaji deqa  
are qalsiqa niŋgi metŋgej.

<sup>15</sup> Deqa ijo was, niŋgi siŋgila na tigeloqnsib Qotei  
aqa anjam kalil iga nami niŋgi merŋgoqnem qaji di  
dauryoqniy. Anjam kalil iga neŋgreŋyoqnem qaji di  
dego niŋgi dauryoqniy.

<sup>16</sup> Gago Tamo Koba Yesus Kristus wo gago Abu  
Qotei wo naŋgi aiyel na iga tulaŋ qalaqalaige-  
qnub. Qotei a gaigai iga siŋgilatgoqnsiqa iga qa are  
boleiyeqnu. Mondon a na iga torei boletgwas.  
Deqa bini iga a qa tarinjoqnsim unum.

<sup>17</sup> O ijo was, Qotei a nuŋgo are siŋgilatetŋgosim  
aqaryainŋimqa niŋgi kumbra bole kalil geregere  
dauryosib wau bole bole yoqniy.

### 3

*Pol a Tesalonaika Kristen naŋgi minjrej, “Niŋgi  
iga qa Qotei pailyoqniy”*

<sup>1</sup> Ariya ijo was, gago anjam qujai beiunu. An-  
jam agiende. Niŋgi iga qa Qotei pailyoqniy. Yimqa  
a na iga aqaryaigimqa iga Tamo Koba aqa anjam  
geregere mare mare laqnqom. Laqnimqa aqa  
anjam di tulaŋ kobaosim sawa sawa kalil kereto-  
qnimqa tamo uŋgasari gargekoba naŋgi quoqnsib  
aqa ñam soqtoqñqab. Nami aqa anjam di nuŋgo  
ambleq di dego tulaŋ kobaej.

<sup>2</sup> Deqa niŋgi iga qa Qotei pailyoqnbqa a na  
iga aqaryaigosim tamo kumbra uge uge yeqnb  
qaji naŋgo baŋq dena iga eleŋqas. Niŋgi qalie,  
tamo gargekoba naŋgi Yesus qa naŋgo areqalo  
siŋgilatosiaeqlub.

<sup>3</sup> Ariya niŋgi quiy. Tamo Koba a gisaŋ tamo sai. Anjam kalil a mareqnu qaji di a bole dauryeqnu. Deqa a niŋgi siŋgilatŋosim taqatŋimqa Satan na niŋgi ugeugeiŋwa keresai.

<sup>4</sup> Iga Tamo Koba aqa ñam na qalieonum, anjam kalil iga nami niŋgi merrŋoqnem qaji di niŋgi dauryeqnub. Bunuqna dego niŋgi dauryoqnsib sqab.

<sup>5</sup> Gago are koba endegsi unu. Tamo Koba a na nuŋgo are prugtetŋimqa niŋgi Qotei aqa qalaqlaiyo kumbra geregere qalieosib dauryoqniy. Osib siŋila na tigeloqnsib gulbe qoboiyoqniy. Agi Kristus a nami siŋila na tigeloqnsiq gulbe qoboiyoqnej dego kere.

### *Niŋgi kalil wauoqniy*

<sup>6</sup> O ijo was kalil, gago Tamo Koba Yesus Kristus aqa ñam na iga anjam bei niŋgi endegsi merrŋgwom. Kristen was qudei nanji gago anjam iga nami niŋgi merrŋoqnem qaji di dauryqa uratosib deqa nanji wauqajqa asginjreqnu. Deqa niŋgi na was nanji di qoreinjrsib sasaloiy. Niŋgi nanji koba na saib.

<sup>7</sup> Niŋgi gago kumbra dauryoqnsib soqniy. Gago kumbra di niŋgi qalie. Iga nami niŋgi koba na sosimqa iga wauqajqa asgigosaiqnej.

<sup>8</sup> Iga nuŋgo ingi uyo laja yainjgosaiqnam. Iga gago segi ingi awaiyoqnsim uyoqnam. Iga niŋgi gulbe eŋwa uratosim deqa iga qanam ti qolo ti waukobaoqnam.

<sup>9</sup> Bole, iga Qotei aqa anjam maro tamo unum deqa iga nuŋgo silali ingi ingi laja yainjwa kere. Di iga uratoqnam. Iga endegsi are qaloqnam.

Iga waquoqnsim gago segi ingi awaiyoqnsim uy-oqnimqa gago kumbra di ningi unoqnsib bole qa maroqnsib dauryoqnqab.

<sup>10</sup> Niñgi qalie, iga niñgi koba na sosimqa endegsi merngoqnam, “Tamo a wauqasai di a ingi uyqasai dego.”

<sup>11</sup> Ariya iga anjam endegsi quem, “Nuñgo ambleq di tamo qudei nañgi wauqajqa asginjreqnu. Nañgi laña sosibqa yomu anjam koba laña laña mareqnub.”

<sup>12</sup> Deqa iga Tamo Koba Yesus Kristus aqa ñam na tamo nañgi deqaji endegsi minjrqom, “Niñgi lawo na sosib waquoqnsib nuñgo segi ingi awaiyoqnsib uyoqniy.”

<sup>13</sup> O ijo was, niñgi kumbra bole yqajqa asginqaiq.

<sup>14</sup> Kristen was qudei nañgi gago anjam iga neñgreñyonum qaji endi uratibqa niñgi na nañgi taqal breinjrib isaq gileb. Yimqa nañgo kumbra ueg deqa nañgi jemainjrqas.

<sup>15</sup> Tamo nañgi di nuñgo jeu tamo edegaib. Niñgi endegsib are qaloqniy, “Tamo nañgi di gago Kristen was. Deqa iga Qotei aqa anjam minjroqnsim nañgi olo tingitnjroqnnom.” Niñgi degsib are qaloqniy.

### *Pol a kaiye anjam neñgreñyosiq Tesalonaika Kristen nañgoq qariñyey*

<sup>16</sup> Tamo Koba a are lawo qa utru. Deqa a na nuñgo are latetñgimqa niñgi gaigai are lawo soqniy. Tamo Koba a niñgi kalil koba na soqnebe.

<sup>17</sup> E Pol. E ijo segi ban na kaiye anjam endi neñgreñyosim nuñgoq qariñyonum. E ijo anjam kobotqa laqnsimqa e degyeqnum. Di ijo kumbra.

**18** Gago Tamo Koba Yesus Kristus a ningi kalil qa  
are boleiyeme. Bole.

**Yesus Aqa Anjam Bole 2000  
The New Testament in the Anjam language of Papua  
New Guinea, 2000 edition  
Nupela Testamen long tokples Anjam long Niugini,  
2000**

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

---

PDF generated using Haiola and XeLaTeX on 28 Dec 2024 from source files dated 31 Aug 2023

6bd977a8-0139-583b-a367-c04faf6223cc